

40 Sinar Harian • Khamis 12 Mei 2016

KUALA LANGAT / SEPANG

MDKL bertindak pantas

Lakukan kerja pembersihan pokok tumbang di kawasan terjejas akibat hujan lebat, angin kencang

BANTING - Skuad Pantas Majlis Daerah Kuala Langat (MDKL) melakukan kerja-kerja pemotongan dan pembersihan pokok tumbang akibat hujan lebat dan angin kencang di sekitar kawasan Bandar Saujana Putra kelmarin, yang menghalang laluan pengguna jalan raya.

Yang Dipertua MDKL, Mohd Azhar Mohamed Ali berkata, operasi berkenaan bermula pada jam 7.45 malam dan seramai empat anggota bertugas dikerahkan ke lokasi berkenaan bagi mengawal lalu-lintas dan melakukan kerja pemotongan serta pengalihan pokok tumbang.


"Kawasan yang terlibat termasuklah Jalan SP 7/14, Jalan SP

7/11 dan juga Jalan SP 7/9.

"Skuad Pantas ambil masa selama hampir lima jam bagi memastikan kawasan yang terjejas benar-benar selamat untuk dilalui pengguna jalan raya," katanya.

Menurutnya, kerja-kerja memotong serta mengalihkan pokok yang tumbang dibantu dengan peralatan dua mesin gergaji selain menggunakan khidmat sebuah pacuan empat roda Skuad Pantas MDKL.

"Beberapa kenderaan orang awam turut dihempap pokok menyebabkan anggota kita turut bantu selenggara kenderaan terjejas...nasib baik tiada siapa yang tercedera," katanya.



Seorang anggota Skuad Pantas bertungkus-lumus melakukan kerja-kerja pemotongan pokok, kelmarin.

Bantah penjualan minuman keras.

SIJANGKANG - Persatuan Penduduk Taman Perwira di sini membantah penjualan minuman keras di sebuah pasar raya di kawasan itu.

Pengerusinya, Abu Bakar Abdullah berkata, beliau mewakili majoriti penduduk ahli kariah Taman Perwira memohon pihak pengurusan premis itu menghentikan penjualan minuman keras sebagai usaha mengelak masalah sosial berlaku di kawasan itu.

"Sebagai wakil penduduk di MPP Zon 1, saya membuat bantahan ini atas rasa tanggungjawab sebagai orang Islam.

"Lagipun kita sedia maklum arak ini tak memberi manfaat malah keburukannya lebih banyak.



Sebahagian penduduk Taman Perwira dan kawasan sekitar yang hadir membuat bantahan secara aman di depan premis berkenaan, baru-baru ini.

"Saya percaya ramai kalangan bukan Muslim juga turut sama berpandangan seperti saya," katanya yang memaklumkan wakil daripada bukan Muslim turut hadir memberi sokongan.

Sementara itu, Ahli Majlis Daerah Kuala Langat, Hairul

Nizam Toha berkata, sebagai umat Islam adalah menjadi kewajipan komuniti membantah jualan arak di kawasan majoriti penduduk beragama Islam.

"Bagi saya, perlu ada kesedaran kepada peniaga untuk melihat di mana kawasan mereka berniaga.

"Sensitiviti masyarakat setempat perlu diambil kira, jadi bila buat bantahan macam ni semua pihak perlulah peka.

"Pihak kami akan mengadakan pantauan terhadap premis berkenaan bagi mengawal penjualan minuman itu," katanya.

Pertandingan imbau nostalgia permainan layang-layang

TANJUNG SEPAT - Bagi mengangkat martabat permainan tradisional, Jawatankuasa Kemajuan dan Keselamatan Kampung Persekutuan (JKKKP) Kampung Tanjung Sepat menganjurkan pertandingan layang-layang di

padang kampung berkenaan, semalam.

Ketua Umno Bahagian Sepang, Datuk Marsom Paing berkata, pertandingan itu mendapat sambutan menggalakkan apabila berjaya menerima 280 penyertaan.



Sebahagian peserta bergambar kenangan sebelum memulakan pertandingan.

Menurutnya, beliau mahu tradisi pertandingan itu diteruskan demi generasi pada masa hadapan.

“Kita faham pelbagai jenis permainan berteknologi yang wujud kini, tapi jika masyarakat boleh anjur apa saja aktiviti melibatkan pelbagai permainan tradisional, saya yakin anak-anak muda akan turut serta,” katanya yang turut hadir melihat pertandingan itu di Kampung Tanjung Sepat.

Sementara itu, seorang suri rumah, Hamidah Rosli, 36, berkata, dia memuji usaha penganjur mengadakan aktiviti seperti itu.

“Saya harap lepas ni ada aktiviti macam ni lagi di tempat kami. Anak saya umur empat tahun seronok dan teruja, sebab tak pernah tengok layang-layang macam mana.

“Pertandingan ni juga imbau nostalgia permainan tradisional yang saya main masa kecil dulu,” katanya.

Kemas kini maklumat profil kampung

MORIB - Bengkel Sistem Profil Kampung Peringkat Nasional dan Kursus Microsoft Word dan Excel anjuran Jawatankuasa Kemajuan dan Keselamatan Kampung Persekutuan Parlimen (JKKKP) yang diadakan di Pusat Internet 1Malaysia Kanchong Darat, kelmarin berjalan lancar.

Kursus membabitkan 10 kampung Dun Morib diadakan bertujuan menambah ilmu berkenaan teknologi komputer kepada penduduk selain dapat mengemas kini maklumat profil kampung.

Gotong-Royong Perdana hapus aedes

TELOK DATOK - Gotong-Royong Perdana di Taman Seri Telok Datok sempena Kempen Kesihatan Hapus Aedes Cegah Denggi Kawasan Telok Datok bakal diadakan, 21 Mei ini.

Program yang bakal dirasmikan Yang Dipertua MDKL, Mohd Azhar Mohamed Ali itu akan diadakan di Balai Raya Taman Seri Telok Datok bermula jam 7.30 pagi.

Pelbagai agensi terlibat termasuk Pejabat Kesihatan Daerah Kuala Langat, Pejabat Pelajaran Daerah Kuala Langat dan Giatmara Banting.

Jom meriahkan Hari Belia Negara

JUGRA - Orang ramai dijemput hadir memeriahkan Sambutan Hari Belia Negara Peringkat Negeri Selangor 2016 akan diadakan di Kolej Matrikulasi Selangor pada 21 hingga 22 Mei ini.

Majlis perasmian pula akan diadakan pada 22 Mei (Ahad) jam 10 pagi dan dijangka Timbalan Perdana Menteri Malaysia, Datuk Seri Dr Ahmad Zahid Hamidi akan hadir merasmikan program tersebut.

Pelbagai pertandingan sukan, persembahan, demonstrasi, pameran dan gerai jualan turut diadakan.

Karnival Smart Selangor minggu ini

MORIB - Karnival Smart Selangor Peringkat Daerah Kuala Langat 2016 bakal diadakan pada 13 hingga 15 Mei ini bertempat di Dataran Pantai Morib Kuala Langat.

Pelbagai aktiviti menarik bakal diadakan seperti Segmen Lawak Santai, Jom Belajar Memanah dan beberapa artis terkenal seperti Aweera juga bakal membuat persembahan.

Orang ramai dijemput hadir bagi memeriahkan acara.